



**Broj: 02-50-1-16-23/08  
Sarajevo: 16.12.2008. godine**

**BOSNA I HERCEGOVINA  
PARLAMENTARNA SKUPŠTINA  
PREDSTAVNIČKI DOM**

**PREDMET: Obavještenje**

Dom naroda Parlamentarne skupštine BiH, na 23. sjednici, održanoj 4.12.2008., razmatrao je sljedeće tačke dnevnog reda:

1. Zahtjev Vijeća ministara BiH za razmatranje Prijedloga zakona o izmjenama i dopunama Zakona o osiguranju depozita u bankama BiH po hitnom postupku, u skladu s članom 122. Poslovnika;
2. Zahtjev Vijeća ministara BiH za razmatranje Prijedloga zakona o dopunama Zakona o porezu na dodatu vrijednost po hitnom postupku, u skladu s članom 122. Poslovnika;
3. Prijedlog kodeksa ponašanja za poslanike i delegate u Parlamentarnoj skupštini BiH (drugo čitanje), predlagač: Zajednička komisija za ljudska prava, prava djeteta, mlade, imigracije, izbjeglice, azil i etiku;
4. Prijedlog zakona o izmjeni Zakona o klasifikaciji djelatnosti u BiH (drugo čitanje), predlagač: Vijeće ministara BiH;
5. Prijedlog zakona o izmjenama i dopunama Zakona o Obavještajno-sigurnosnoj agenciji BiH (prvo čitanje), predlagač: Zajednička sigurnosno-obavještajna komisija za nadzor nad radom Obavještajno- sigurnosne agencije;
6. Prijedlog zakona o izmjenama i dopunama Zakona o zaštiti tajnih podataka (prvo čitanje), predlagač: Zajednička sigurnosno-obavještajna komisija za nadzor nad radom Obavještajno-sigurnosne agencije;
7. Prijedlog zakona o maloljetnim počiniocima krivičnih djela i kaznenopopravnoj zaštiti djece i maloljetnika (prvo čitanje), predlagač: Vijeće ministara BiH;
8. Prijedlog zakona o zaštiti i dobrobiti životinja (prvo čitanje), predlagač: Vijeće ministara BiH;
9. Izvještaj o izvršenju Budžeta institucija BiH i međunarodnih obaveza BiH za period I-XII 2007. godine;
10. Informacija o stanju u oblasti imovinskih delikata u Bosni i Hercegovini, s naglaskom na krivično djelo otuđenja vozila u 2006. i 2007. godini i u prvih šest mjeseci 2008. godine;
11. Izvještaj Zajedničke komisije za usaglašavanje prijedloga za imenovanje ombudsmena u Instituciju ombudsmena za ljudska prava BiH;
12. Izvještaj Zajedničke komisije za usaglašavanje prijedloga za imenovanje zamjenika generalnog revizora;
13. Izvještaj o radu Državne komisije za reviziju odluka o naturalizaciji stranih državljana u BiH za period od 1. 1. 2008. do 30. 6. 2008.;
14. Privremeni izvještaj o radu Interresorne radne grupe na izradi Prijedloga zakona o imunitetu;

15. Godišnji izvještaj o napretku (praćenje provođenja Akcionog plana 1 Strategije reforme javne uprave u Bosni i Hercegovini - materijali Vijeća ministara BiH);
16. Deklaracija o dobroj upravi, predlagač: Predstavnički dom;
17. Prijedlog zaključaka povodom Informacije o krivičnim djelima protiv života i tjela, s naglaskom na nasilje u porodici za 2006. i 2007. godinu te tendencijama u prva tri mjeseca 2008. godine;
18. Izbor članova Upravnog odbora Agencije za razvoj visokog obrazovanja i osiguranje kvaliteta (rang-lista Vijeća ministara BiH);
19. Zahtjev ustavnopravnih komisija oba doma Parlamentarne skupštine BiH za davanje ovlaštenja za utvrđivanje prečišćenog teksta Zakona o Sudu BiH i Zakona o Tužilaštvu BiH;
20. Inicijativa za izradu novog zakona o javnim nabavkama BiH – predlagač delegat Dušanka Majkić;
21. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i BANK AUSTRIA CREDITANSTALT AG - Projekat izgradnje vodovoda Fojnica-Kiseljak i kanalizacionog kolektora Lepenica-Kiseljak;
22. Davanje saglasnosti za ratifikaciju Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija;
23. Davanje saglasnosti za ratifikaciju Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH;
24. Davanje saglasnosti za ratifikaciju Evropskog sporazuma o dostavljanju molbi za pravnu pomoć;
25. Imenovane Ad hoc komisije za izradu izmjena i dopuna kao i prečišćenog teksta Poslovnika Doma naroda.

#### **Ad. 1,i 2**

Dom naroda usvojio je zahtjev Vijeća ministara BiH iz ovih tačaka, a nakon toga su usvojeni:

- Zakon o izmjenama i dopunama Zakona o osiguranju depozita u bankama BiH sa zaključkom:

„Dom naroda Parlamentarne skupštine BiH zadužuje nadležne institucije, prije svega Vijeće ministara BiH, da se angažiraju na povećanju sredstava Fonda za osiguranje depozita i traži od Vijeća ministara BiH da predloži u najkraćem roku nove izmjene i dopune Zakona kojim bi se osigurani iznos približio osiguranim depozitima u zemljama u okruženju“.

- Prijedlog zakona o dopunama Zakona o porezu na dodatu vrijednost

#### **Ad. 3.**

Dom naroda usvojio je sa osam amandmana Kodeks ponašanja za poslanike i delegate u Parlamentarnoj skupštini BiH u identičnom tekstu kao i Predstavnički dom.

#### **Ad. 4.**

Dom naroda usvojio je Zakon o izmjeni Zakona o klasifikaciji djelatnosti u BiH u predloženom tekstu.

#### **Ad. 5. do 6.**

Dom naroda usvojio je u prvom čitanju:

- Prijedlog zakona o izmjenama i dopunama Zakona o Obavještajno-sigurnosnoj agenciji BiH
- Prijedlog zakona o izmjenama i dopunama Zakona o zaštiti tajnih podataka

#### Ad. 7.

Dom naroda odgodio je izjašnjavanje o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika nakon održavanja javne rasprave i usvojio sljedeći zaključak:

Kolegij Doma naroda Parlamentarne skupštine BiH, u dogovoru s predsjedavajućima klubova naroda, donio je zaključak kojim se izjašnjavanje o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika odgađa do završetka javne rasprave.

#### Ad. 8.

Dom naroda usvojio je u prvom čitanju Prijedlog zakona o zaštiti i dobrobiti životinja

#### Ad. 9.

Dom naroda usvojio je Izvještaj o izvršenju Budžeta institucija BiH i međunarodnih obaveza BiH za period januar-decembar 2007. godine sa sljedećim zaključcima:

1. Nalaže se Ministarstvu finansija i trezora BiH da preduzme neophodne mjere s ciljem unapređenja procesa planiranja, kontrole i izvršenja Budžeta i da o tim mjerama obavijesti Komisiju za finansije i budžet.
2. Skreće se pažnja Ministarstvu finansija i trezora BiH da je dužno poštovati odredbe člana 22. stav 2. Zakona o finansiranju institucija BiH („Službeni glasnik BiH“, br. 61/04) i redovno Parlamentarnoj skupštini BiH dostavljati šestomjesečne izvještaje o izvršenju budžeta institucija BiH i međunarodnih obaveza BiH.
3. Dom naroda traži od Vijeća ministara BiH da poštuje zakonske rokove kad se radi o izradi prijedloga zakona o budžetu institucija BiH za narednu godinu.
4. Dom naroda traži od Vijeća ministara BiH da Prijedlog zakona o budžetu institucija BiH za 2009. godinu u što kraćem roku dostavi Predsjedništvu BiH kako bi što prije bio dostavljen u parlamentarnu proceduru.“

#### Ad. 10.

Dom naroda primio je k znanju Informaciju o stanju u oblasti imovinskih delikata u Bosni i Hercegovini, s naglaskom na krivično djelo otuđenja vozila u 2006. i 2007. godini i u prvih šest mjeseci 2008. godine

#### Ad. 11.

Dom naroda usvojio je Izvještaj Zajedničke komisije za usaglašavanje prijedloga za imenovanje ombudsmena u Instituciju ombudsmena za ljudska prava BiH, te za ombudsme u Instituciju ombudsmena za ljudska prava BiH imenovao:

- **Jasminku Džumhur** iz bošnjačkog naroda i
- **Ivu Bradvicu** iz hrvatskog naroda.

Dom naroda **nije** usvojio zaključak koji je predložila Ad hoc komisija.

#### Ad. 12.

Dom naroda usvojio je Izvještaj Zajedničke komisije za usaglašavanje prijedloga za imenovanje zamjenika generalnog revizora te **Dževada Nekića** iz bošnjačkog naroda imenovao za zamjenika generalnog revizora.

### **Ad. 13.**

Dom naroda usvojio je Izvještaj o radu Državne komisije za reviziju odluka o naturalizaciji stranih državljana u BiH za period od 1. 1. 2008. do 30. 6. 2008. sa sljedećim zaključcima:

1. Prihvata se Izvještaj o radu Državne komisije za reviziju odluka o naturalizaciji stranih državljana u Bosni i Hercegovini za period od 1.1.2008. do 31.6.2008.
2. Zadužuje se Vijeće ministara BiH da ispoštuje zaključke Parlamentarne skupštine BiH donesene na odvojenim sjednicama Predstavničkog doma i Doma naroda, održanim 13. februara 2008. i 25. februara 2008.
3. Izvještaj kao informaciju treba dostaviti svim resornim ministarstvima koja su vodila prvostepeni postupak i donosila odluke o dodjeljivanju državljanstva Bosne i Hercegovine, kao i nadležnim pravosudnim organima radi nadležnog postupanja..
4. Obavezuje se Državna komisija za reviziju odluka o naturalizaciji stranih državljana u BiH, Ministarstvo sigurnosti BiH – Služba za poslove sa strancima i Granična policija BiH, te Ministarstvo civilnih poslova BiH – Direkcija CIPS projekta da, u roku od tri mjeseca, od Komisije preuzmu bazu podataka o oduzetim državljanstvima BiH stečenim naturalizacijom i inkorporiraju je u CIPS i ISM (informacioni sistem za strance) tako što će je učiniti operativnom i dostupnom organima za provođenje zakona u BiH.
5. Obavezuje se Državna komisija da, u što kraćem roku, u „Službenom glasniku BiH“ objavi imena svih lica kojima je oduzeto bh.državljanstvo stečeno naturalizacijom i da to ubuduće čini najmanje jednom mjesečno tokom svog rada.
6. Zahtijeva se od Državne komisije efikasniji rad na reviziji bh.državljanstava stečenih naturalizacijom u skladu sa zakonima BiH.
7. Traži se od SIPE-e i Tužilaštva BiH da, u što kraćem roku, podnesu izvještaj o preduzetim mjerama protiv lica koja se dovode u vezu s nezakonitim davanjem bh.državljanstva na osnovu naturalizacije u periodu od 18. aprila 1992. do 1. januara 2006., za sve nivoe vlasti u BiH.

### **Ad. 14.**

Dom naroda usvojio je Privremeni izvještaj o radu Interresorne radne grupe na izradi Prijedloga zakona o imunitetu

### **Ad. 15.**

Dom naroda primio je k znanju Godišnji izvještaj o napretku (praćenje provođenja Akcionog plana 1 Strategije reforme javne uprave u Bosni i Hercegovini) sa sljedećim zaključcima:

1. Potrebno je inicirati održavanje sjednice Koordinacionog odbora za ekonomski razvoj i evropske integracije s ciljem rješavanja utvrđenih problema, osiguranja daljnjeg koordiniranog pristupa i nastavka političke podrške provođenja reformskih mjera (u skladu sa Zajedničkom platformom o principima i metodi primjene Akcionog plana 1. Strategije reforme javne uprave u BiH).
2. Od institucija i organa uprave na nivoima obuhvaćenim Strategijom reforme javne uprave zahtijeva se veći stepen saradnje i odgovornosti u provođenju reformskih mjera, razmjeni i dostavljanju informacija s ciljem efikasnijeg koordiniranja i praćenja pokrenutih i ostvarenih aktivnosti.
3. Neophodno je ojačati poziciju i ulogu koordinatora za reformu javne uprave, posebno Vlade Federacije BiH i Vlade Republike Srpske, te unaprijediti koordinaciju ostalih struktura za

primjenu mjera i aktivnosti iz Akcionog plana 1, koju čine imenovani predstavnici Vijeća ministara BiH, Vlade Federacije BiH, Vlade Republike Srpske i Vlade Brčko Distrikta BiH.

4. Potrebno je nastaviti razvijati mehanizme za koordiniranje i konsultacije organa uprave svih nivoa zbog usaglašenog djelovanja prema donatorima i efikasnijeg korištenja donatorske pomoći.

#### **Ad. 16.**

Dom naroda **nije** usvojio Deklaraciju o dobroj upravi uz konstataciju da se navedena Deklaracija vrati predlagaču na doradu.

#### **Ad. 17.**

Dom naroda jednoglasno je usvojio zaključke povodom Informacije o krivičnim djelima protiv života i tijela, s naglaskom na nasilje u porodici za 2006. i 2007. godinu te tendencijama u prva tri mjeseca 2008. godine a koji glase:

1. Dom naroda Parlamentarne skupštine BiH konstatirao je da je nasilje u porodici u značajnom porastu i predstavlja veliki društveni problem;
2. Dom naroda Parlamentarne skupštine BiH poziva nadležne institucije na primjenu mjera predviđenih Rezolucijom o borbi protiv nasilja nad ženama u porodici Parlamentarne skupštine BiH („Službeni glasnik BiH, br.15/08), naročito uključujući obavezu usvajanja odgovarajućih zakonodavnih i budžetskih mjera, te osiguravanja efikasne primjene već usvojenih zakona i mjera, a posebno osiguravanja bržeg pristupa sudovima, kao i efektivnog izricanja zaštitnih mjera, uspostavljanja objekata za podršku žrtvama nasilja u porodici i njihovom finansiranju, te obuke osoblja u zdravstvu, policiji, pravosuđu, socijalnim i obrazovnim ustanovama;
3. Konstatira se da su ustanove za socijalnu zaštitu u Bosni i Hercegovini materijalno i kadrovski neadekvatno opremljene te da ne mogu uspješno odgovoriti svom zadatku kad je u pitanju postupanje u slučajevima nasilja u porodici, pa je neophodno utvrditi i provoditi mjere za njihovo jačanje;
4. Dom naroda Parlamentarne skupštine BiH traži od Vijeća ministara BiH da do kraja 2008. godine podnese Parlamentarnoj skupštini BiH na usvajanje Prijedlog strategije za prevenciju i borbu protiv nasilja u porodici, nasilja na osnovu spola, seksualnog uznemiravanja i uznemiravanja u Bosni i Hercegovini, te da o njenom provođenju najmanje jednom godišnje izvještava Parlamentarnu skupštinu BiH;
5. Kako su prijedlozi mjera i radnji iz Informacije Ministarstva sigurnosti BiH o krivičnim djelima protiv života i tijela, s naglaskom na nasilje u porodici za period 2006. i 2007. godine, te tendencijama u prva tri mjeseca 2008. godine dosta uopćene i preširoke, Dom naroda Parlamentarne skupštine BiH traži od Vijeća ministara BiH da nadležno ministarstvo konkretizira navedene prijedloge mjera i radnji, te da preduzme neophodne mjere za njihovo provođenje.

#### **Ad. 18.**

Dom naroda usvojio je Rang-listu kandidata za članove Upravnog odbora Agencije za razvoj visokog obrazovanja i osiguranje kvaliteta koju je utvrdilo Vijeće ministara BiH.

#### **Ad. 19.**

Dom naroda ovlastio je ustavnopravne komisije oba doma Parlamentarne skupštine BiH za utvrđivanje prečišćenog teksta Zakona o Sudu BiH i Zakona o Tužilaštvu BiH.

**Ad. 20.**

Dom naroda usvojio je Inicijativu za izradu odgovarajućeg zakona o javnim nabavkama BiH čiji je predlagač delegat Dušanka Majkić sa sljedećim zaključkom:

1. Dom naroda nalaže Vijeću ministara BiH da u roku od 60 dana izradi i u parlamentarnu proceduru uputi odgovarajući Prijedlog zakona o javnim nabavkama BiH.
2. Dom naroda traži da se u odgovarajući zakonski prijedlog ugrade odredbe koje Agenciji za javne nabavke daju veća ovlaštenja i odgovornost u pogledu obuke ugovornih organa i dobavljača, kao i monitoring u procesu javnih nabavki.

**Ad. 21. do 24.**

Dom naroda jednoglasno je dao saglasnost za ratifikaciju sporazuma iz ovih tačaka dnevnog reda.

**Ad. 25.**

Dom naroda imenovao je Dušanku Majkić, Iliju Filipovića i Hazima Rančića u Ad hoc komisiju za izradu izmjena i dopuna kao i prečišćenog teksta Poslovnika Doma naroda.

S poštovanjem,

**PREDSJEDAVAJUĆI**  
**DOMA NARODA**  
dr. Mladen Ivanić